

ML
L E T T R E ^{Lelong}
18629

DVN GENTIL-HOMME

CATHOLIQUE FRANCOIS

à Messieurs de la Sorbone

de Paris.

*Sur la nouvelle victoire obtenue par le Roy de
Navarre contre Monsieur de Joyeuse,
à Contras le Mardy vingtiesme
d'Octobre, 1587.*



Imprimé nouvellement.

Case

F

39

.326

1587 Let

THE NEWBERRY
LIBRARY



LETTRE D'VN GENTIL-

HOMME CATHOLIQUE FRAN-
çois, a Messieurs de la Sorbonne de
Paris, sur la nouuelle victoire obte-
nue par le Roy de Nauarre, contre
Monsieur de Ioyeuse, à Coutras le
Mardy vingt-iesme d'Octobre, 1587.



ESSIEVRS, Je ne sçay
point à mon auis, le premier
qui vous rapportera la deplo-
rable nouuelle de la mort de
Monsieur de Ioyeuse, & de la
desfaite de toute son armee:
par consequēt i'auray occasion de me resiouir
que ie n'auray poiut esté l'auteur de vostre tri-
stesse, mais ie ne veux pas laisser à m'aquiter de
mō deuoir, ny estre le dernier de ceux qui vous
diront leur auis d'un accident si estrange, afin
que ie vous tesmoigne qu'en mō particulier ie
me refens de ceste calamité publique, non pas
pour desesperer de ce que ceste fineste iournée
nous a laissé de reste, mais afin de rechercher les
plus solides esperances que nous en pouuōs &
deuons conceuoir pour enfanter le repos de ce

miserable Royaume. Et d'autât que vous estes
 la plus seignalée cōpagnie ou le principal poit
 de l'estat, assauoir la Religion, se traicte, Je m'a
 dresse principalement à vous, afin que vous iu-
 giez de mô zele, & que, s'il s'en peut tirer quel
 que profit, vous en faciez part à ceux qui vous
 tendent tous les iours l'oreille pour l'intelligē-
 ce de leur salut, & que ce soit le fondement ou
 nos ruines se puissent rebastir au cōmun soula-
 gement du peuple, & à la descharge de vos cō-
 sciences. Mais deuant que venir à ces remedes
 ie vous descouriray les nouuelles playes que
 nous auons receu en la iournée de Coutras le
 20. de ce moys par le Roy de Nauarre, assisté
 de Messeigneurs le Prince de Condé, le Conte
 de Soissons, Messieurs de Turenne, de la Tri-
 mouille, & autres seigneurs & gētilshōmes de
 leur party. Ledit Sieur Roy estant de retour de
 Môforeau, où il y auoit heureusemēt seiourné
 l'ēpace de quinze iours ou enuiron, apres les des-
 faites des cōpagnies de feu Môsieur de Ioyeu-
 se, & du Marquis de Renel cōme ils se retiroiēt
 de leur voyage de Poictou, & ayant pris par la
 cōduite de môdit Sieur de Turenne le riche ba-
 gage de Monsieur de Mercœur au pres de Sau-
 meur venāt de son gouuernemēt de Bretagne
 pour ioindre son beau frere ledit Sieur de Ioy-
 yeuse, qui estoit encore pour lors en la ville de
 Tours, & outre cela recueilli mondit Seigneur
 Côte de Soissons avec toutes ses troupes: apres

dis-je que ledit Sieur Roy fust de retour, & qu'il eust conduit son armee en Saintonge, il print deux pieces de canô à la Rochelle, & en fin se delibera de s'acheminer en Gascogne, tât pour se réforer de troupes, que pour aller ioindre son armee estrangere par le bord des prouinces qui luy sont fauorables. Et dautant que côme vous scauez c'estoit la seule chose que le Roy craignoit le plus, il dôna charge à mondit Sieur de Ioyeuse de luy empescher ce dessein par toutes les voyes qu'il luyseroit possible, iusques a n'espergner point l'extremité du cōbat, si tous autres expediēs luy defailloyēt. Ce qu'il entreprint, & pour cest effet s'achemina avec les troupes qu'il auoit auparauāt, & celles que sa majesté luy acorda de nouueau pour le fortifier dauātage, & luy faire moins craindre celles que le Roy de Nauarre emmenoit. Le suiet de ceste entreprise cōsistoit au passage des riuieres de la Droune & de l'Isle & celui qui auroit esté plus diligent à s'en saisir deuoit faire la loy au plus paresseux. A raison dequoy, mondit Sieur de Ioyeuse apres auoir quelques iours talonné & costoyé l'armée du Roy de Nauarre, en fin s'auance vers la Roche-Chalays en intention, suyuant le bon aduis que luy donna Monsieur le Marechal de Matignô, de s'éparer de Coutras, qui estoit la plus importante place à cause de sa situation fauorable pour le passage de la Droune. Mais il y perdist son temps, à cause

que sur le point que ses cheuaux legers y furent arriuez, & y prenoyent desia leur logis, ceux du Roy de Nauarre s'y récontrerent les plus forts & s'en rédirēt les maistres le Lundy au soir dix-neufiesme de ce mois. Ainsi outre la diligence dudit Sieur Roy, qui est la partie plus necessaire aux executiōs de la guerre, & celle qui luy a fait gagner beaucoup de reputatiō parmy les siēs, sa force fust preiudiciable audit sieur de Ioyeuse Et neātmoins pour le desir qu'il auoit de rēdre tous les deuoirs d'obeyssance aux commandemens de son Maistre, & pensant que le Roy de Nauarre enfermē des deux riuieres seroit facilement vaincu, il se resolu le iour ensuyuant de le combattre, & à ces fins donne à son armée le rendezuous entre la Roche-Chalays & Coutras ou il se trouua de grād matin, & print à loysir & sans aucū empeschemēt destroupes dudit Sieur Roy, sa place de bataille à demy lieue de Coutras aussi auantageusemēt qu'il estoit possible. Ledit Sieur Roy, à ce qu'ō m'a dict, en ayāt receu le premier aduertissemēt d'assez bō matin, attēdit le secōd, voire le tiers deuāt que s'en esmouuoir, combien qu'il ne fait pas moindre semblāt d'auoir enuie de combattre que les nostres. Et de fait il nous en auoit presentē les occasions par deux diuerfes fois quelques iours au parauant, mais nous ne nous trouuasmes point encore en nos aduātages. Toutesfois aussi tost que cēs diuers rapports eurent asseuré ledit sieur

Roy, il monte à cheual & partāt de Coutras, va au deuant dudit Sieur de Ioyeuse, met s^a armée en bataille, & cependant commāde au Sieur de Clermont maistre de son Artillerie, de la passer de son costé de la riuiere, ce qu'il n'auoit peu faire le iour auparauāt, & l'ayāt fait conduire à la teste, il la disposa de telle façō que sans incōmoder ni les vns ni les autres des siēs, elle ioua fort à propos enuiron les huit heures dans le premier escadrō de noz gens de cheual de huit ou neuf volée, qui nous emporterent beaucoup de Gentils-hommes, & firent prendre resolution au demeurant d'aller plustost à la charge que mourir miserablement sans rendre aucū combat. Ainsi enuiron les neuf heures, nostre caualerie legere dōna avec quatre cēs cheuaux dans celle du Roy de Nauarre, laquelle apres quelque combat fut en fin esbranslee, & les nostres se firent iour. Le reste de l'armée dudit Sieur Roy estoit de quatre bataillons carrez, dōt celuy, de Monsieur de Tureine fust effleuré par le Sieur de Lauerdin: les trois autres, ou estoient les trois Princes du sang, virent tout ce choc de pied ferme, & soudāi apres, le Sieur de Ioyeuse alla furieusement à la charge pour la meslée generale, à laquelle cestrois Princes chacun à la teste de son escadron, vindrent au pas & au trot seulemēt, aussi ferrez & en si belle assurance que i'aye iamais veu marcher gēs de guerre. Cōme on fut aux mains les nostres tour

nerēt soudainemēt le dos , soit pource que les
lāces firēt de l'épéchemēt en l'estroit de la mes-
lée, soit que nous fussons receuz assez rude-
mēt. En fin le cōbat fut si aspre & si viollet que
il en fut de moindre durée , & comme les ar-
mes sont iournalieres, l'entiere victoire en de-
meura au Roy de Nauarre. Et c'est chose esmer-
ueillable qu'à dix heures il ne se trouua aucun
des nostres qui rēdist cōbat, ni qui mēme parust
sur le champ , lequel demeura couuert de noz
morts en grand nombre, & biē seignalé. Ceux
qui eschaperent l'extremité des armes, ou sen-
fuirent honteusement, ou tomberent entre les
mains de leurs ennemis , les vns blecez les au-
tres non sans que toutesfois il s'en soit perdu,
en vne si remarquable desfaicte , que bien peu
du costé dudit Sieur Roy de Nauarre, ny mes-
mes pas vn de marque , ny de commandemēt.
Mais des nostres tous les Chefs sont ou blesez,
ou morts, ou prins: outre Monsieur de Joyeu-
se General, dont la perte seule seroit suffisante
pour nous faire gemir à bon escient , comme
celle qui porte vn grād coup à nos affaires tels
que nous les auons veus disposez & remis par
le Roy à la cōduicte de sa fortune. Toutesfois
elle est comblee d'une infinité d'autres pertes
que nous y auōs fait, afin qu'il nous reste moins
dequoy nous ayder à nous releuer d'une si mi-
serable cheute. Je vous nōmeray les plus nota-
bles de ceux qui sont morts, dōt i'ay memoire,

afin que les vous representant vous puissiez
 mieux cōtempler ce malheur, qui ne sera peut
 estre q̃ le chemin à beaucoup d'autres ou nous
 courons, si Dieu ne nous retient. Entre nos
 morts donc, outre ledit Sieur de Ioyeuse, sont
 le Sieur de saint Sauueur son frere, le Sieur de
 Bressay qui portoit la cornette blâche, le Sieur
 de Roussay puisné de Pienné guidó dudit sieur
 de Ioyeuse, les Contes de la Suze, de Gouuelo,
 d'Aubigeou, le Sieur de Fumel, le Sieur de
 Neufuy de Perigord laisné, le fils du Sieur de
 Rochefort Croisette, le Sieur de Gurat cornet
 te de Mairmont, le Sieur de saint Fort guydon
 du Sieur de saint Luc, le Sieur de Vaux Lieu-
 tenant du Sieur de Bellegarde, l'Enseigne du
 Sieur de Môtigny, Tiercelin maistre de camp,
 le Chenet son premier Cappitaine, la Vallade
 l'un de ses Cappitaines, le Cappitaine Baccu-
 lard, le ieune Campels qui portoit vn drapeau,
 le Sieur de Pluvault, & la Brâgerie, tous
 ayâs charge en nostre armee. Il y en a d'autres
 mais ie ne m'en suis peu bonnement resouue-
 nir. Tant y a Messieurs que voyla des braues
 gentilshomes, voyla des bós seruiteurs du roy,
 voyla des bons supports de nostre party que
 nous auons perdu en ceste iournée, & dont la
 mort rend si malheureuse nostre vie qu'ils sont
 sans doute plus heureux que nous qui respirós
 encore cest air infecté de nos miseres. Ie croy
 que ceux à qui ceste perte touche le plus, seront

aussi le plus touchez de regret qu'ils en doiuent
 auoir, & ie voustiens si affectionnez au bien
 de vostre patrie que vous en respendrez pour
 vostre part vn fleuve de larmes qui ne tariront
 point de l'og tēps, veu que le dōmage que vous
 en receuez s'estend si loing, & qu'il passe plus
 outre que les plus passionnez ne peuuent ap-
 percevoir. Nous scauons tous l'assurance que
 nous auīōs q̄ le tout succederoit autremēt pour
 nous qu'il n'a succedé, de façō que ce que nous
 doit estre aussi plus d'ēnuy d'auoir esté trōpez.
 Et combien que la volonté de Dieu y soit ap-
 parēte, & que c'est pluſtost à nous d'y acquies-
 cer que de murmurer à l'encontre, si ne laissē-
 ie point de sentir que Dieu l'a ainsi voulu pour
 nous punir à bon escient, d'auoir eu plus de
 foy au bras de la chair qu'au sien, & qui plus
 est, d'auoir, à mon aduis, combattu sans inter-
 roguer la bouche du Seigneur. Voulez vous
 de plus seignalez tesmoignages pour la confir-
 mation de mon dire que la mort de ceste bra-
 ue noblesse? Cela n'est que trop suffisant pour
 nous extorquer ceste croyāce, & quād vous ier-
 terez l'œil sur le reste qui est demeuré captif en-
 tre les mains du Roy de Nauarre, vous verrez
 par maniere de dire nostre douleur pl⁹ en vie,
 comme si leur captiuité deschaïsnoit les maux
 qui courent à toute bride à nostre oppression.
 Je vous en veux faire le denōbrement de la pl⁹.

notable partie. Vous y auez le Sieur de Belle-
garde gouuerneur de Sainctonge & d'Angou-
mois qui y a esté prins & blessé & depuis dece-
dé, le Sieur de S. Luc gouuerneur de Broüages
& des Isles de Sainctonge prins, le Marquis de
Piennes, le Côte de Mōforeau prins & blessé,
le Sieur de Sanfac prins, le Sieur de Cypierre,
le Sieur de Saultray de la maison du Lude, le
Sieur de Montigny cappitaine de la porte du
Roy, le Sieur de Ville comblin Lieutenant du
Sieur de Souuray, le Sieur de Chasteau-renaud
guidon du Sieur de Sanfac, le Sieur de Mau-
mont Capitaine de cheuaux legers, le Sieur de
la Patriere guidon du Sieur de Lauerdin, le
Sieur de Chasteauuieux, le Sieur de Chastelu,
le Sieur de Lauuerdiere guidō du Sieur de Su-
ze. Ce sont tous chefs & gens de commande-
ment recogneuz d'un chacun, en quoy ie ne
vous fay point estat des cappitaines de gens de
pied, ny d'autres gentilshoimmes particuliers
qui sy sont trouuez sans y auoir commande-
ment, & cependant y sont demeurez ou morts
ou prins ou blesez. Quant à ceux qui sont en
vie peut estre en auez vous encore quelque
consolation, esperant qu'ils reuiendrōt au ser-
uice du Roy, de Nauarre, duquel tous ceux la,
ou pour le moins la plus grand part sont parti-
culierement sequiteurs de lōgue main, & n'ont
iamais porté les armes contre luy qu'a regret,
pour le moins ce sont leurs protestations ordi

naires qu'ils ont confirmé bien souuent par effect. Et quand ils n'auroiét eu qu'une estincelle de bonne affection audit Sieur Roy, il a assez d'industrie pour en embrazer vn grand feu, & par ainsi il nous soustraira ces reliques de nostre ruine pour s'en preualoir, si ce n'est contre nous directement, se sera indirectement pour luy mesme & non pour nous. Car vous scauez comme tout le monde parle de la merueilleuse grace qu'il a à gagner le courage des personnes, & rompre les malueillances de ses ennemis quand il leur peut faire sentir sa courtoisie. Croyez qu'une bonne partie de ses Messieurs luy ayant tant d'obligation la luy voudront désormais conseruer, & s'en trouuera fort peu d'être eux à qui les caresses de ce Prince ne fassent la loy telle qu'il vouldra. Ce pédât il aura son passage libre pour aller ioindre ses estrangers. Car quand à Monsieur le Marechal de Matignon quelque bon seruiteur du Roy qu'il soit, il est attaché à la Gascogne, & d'ailleurs les forces qu'il a ne sont pas suffisantes pour empêcher ledit Sieur Roy d'exécuter son dessein avec toute la facilité qu'il scauroit desirer, & meshuy il ne le scauroit exécuter ny desirer avec plus d'honneur ayant obtenu contre nous une si belle victoire, laquelle est accomplie de toutes les parties qu'on y pourroit remarquer. La mort & la prise des Chefs horsmis le Sieur de Lauerdin qui ne pensa

qu'a se sauuer voyant de loing nostre meslee, & de bien peu d'autres) le camp gaigné, l'artillerie prinse, les logis de l'armee bruslez, la poursuite de la desfaicte quatre lieües durant, & mille autres particularitez que i'obmetz. Quât au Roy de Nauarre on m'a rapporté de bonne part qu'il fut des plus aspres au combat, & vint aux mains à bon escient, iusques à emporter à force de cornette de Chasteau-renaud, & remporter vn coup de lance qui luy effleura le col, & d'autres qui luy meurtrirent la main & le visage : Bref il fit du cappitaine à ranger la bataille, & du soldat à la meslee. Quant à Monseigneur le Prince de Condé il combatit valleurusement, vn cheual luy fut tué entre ses iambes, & comme il fut remonté fust prisonnier le Sieur de saint Luc, duquel il auoit esté porté par terre. Le Conte de Soissons fust en ce premier rencontre si belle espreuue de son courage qu'il donna beaucoup de contentement & desperance de soy à ceux de leur party, car il se mesla à bon esciét, & fit prisonnier de sa main le marquis de Pienne. De façon que ces trois Princes en combattant leurs ennemis combattoient reciproquement leur propre vertu d'une si belle enuie qu'ils n'ont rien à s'éuier pour ce regard, puis qu'ils ont tous rédu deuoir aux occurrences qui s'en sont presentes. Et ne doutez pas que ses chefs si asseurez n'ayent de beaucoup asseuré les mémbres, entre lesquels le Sieur

de Turenne eut aussi vn cheual tué dans le combat, & se mesla fort viuement, le Sieur de la Trimouille qui fust remarqué à la teste de ses cheuaux legers pour auoir beaucoup de courage & d'asseurance: en fin il n'y eut troupe en leur armee qui ne rapportast sa part de la gloire sur nostre desfaicte. En quoy nous auons occasion de nous contrister puis q' les maux q' nous leur faisons ne font qu'irriter les nostres, & que tost ou tard ils trouuent moyen de nous rendre la pareille. Toutesfois pour le present c'est beaucoup plus que la pareille; & n'y a nulle comparaison du dommage que nous leur auons fait depuis le commencement de ces troubles, quand vous auriez ramassé tout ensemble, à celuy que nous auons receu de ceste bataille. Vne seule petite iournée les a recompensez de tout ce qui leur est adueni en deux ans & demy qu'il y a que la Ligue se declara, & à ce que ie voy nous leur deuons à bon escient de reste. Nous auons veu les puissantes armées que le Roy a despatché en toutes les Prouinces de ce Royaume pour en venir à bout, monstrez-moy le fruit qu'il en a rapporté. Prises de places? On n'a prins que celles qu'ils ne faisoient pas grand estat de tenir & toutes bicoques qui n'ont iamais eu de nom par maniere de dire que par leur desastre. Mais comment les auons nous encoré prises? Avec beaucoup de temps, avec vne excessiue despence, avec vn monde de tra-

uail & d'artifice qu'on n'eust pas anciennemēt
 pratiqué aux sieges de Mets, de saint Quētin,
 & d'autres bonnes villes qui sont aduenues de
 mon temps. Qu'auons nous auancé? Nous n'a-
 uons rien pris par assaut, & tous nos sieges ont
 fini par vne auantageuse & honorable compo-
 sition pour les assiegez. Nos sieges donc n'ont
 pas amoindri leur nombre, puis que les droits
 de la guerre les ont garantis de la fureur de no-
 stre guerre. Et qui pis est, Castillon qui estoit le
 plus superbe trophée de Monsieur du Maine,
 qui auoit cousté six sepmaines & six cens mille
 liures à prendre, fut repris par monsieur de
 Tureine en vne heure, & sans nulle despence.
 Le Roy de Nauarre print en moins de trois
 sepmaines Tallemont, saint Messan, Fonte-
 nay, Maillezay, Mauleon, & cinq ou six autres
 petits Chasteaux. Mōdit Sieur de Ioyeuse vint
 apres en intētion de regagner ces pertes, mais
 il passa la plus part du temps à faire ses prepa-
 ratives, & en fin attaquant saint Maissan il fut
 contraint d'y tirer onze cens treize coups de
 canon, qui n'auoit pas cousté audit Sieur Roy
 deux cens harquebuzades. & sans la desfaite
 que mondit Sieur de Ioyeuse fit à la Mothe des
 deux regimēs de Charbonniers & Desbories &
 la discorde qui suruint entre les assiegez, nous
 ne l'eussions pas emportee si tost, ny si aisēmēt
 comme nous fismes. Quant à Maillezay, que
 ledit Sieur de Ioyeuse print aussi, il le surprint

plustost qu'il ne le print, & le peu de leurs soldats favorisa ses desseins. Mais Fôtenay luy fut de trop dure digestion, & les forces Catholiques cederent aux Huguenors, de qui nous faisons si peu d'estat. Quant à ce qu'il est mort des leurs en bon nombre, comme il ne se peut faire autrement, si nous venions aux rolles de nos armées, nous trouuerions que la regle de soustraction nous seruira pour trouuer nostre conte. Le glaive, le mauuais temps, la faim, la pauvreté, la peste, & des autres maladies nous en ont tant rai qu'il ne nous en reste que bien peu pour les abâdonner aux memes malheurs, & le pis est que nous n'en venions iamais à l'espargne, ains plustost semble que nous pratiquons ce dire detestable : *Laissez perir les amis, pourueu que les ennemis aussi periſſent.* Dauantage en quoy se sont reculez leurs affaires? Nous auons tenu la campagne: mais quoy? ça esté le plus souuent en vne saison que la retraite des villes estoit plus agreable & plus seure contre les iniures des vents & des neiges, en vne saison, dis-ie, que quand ils eussent esté assez forts pour tenir la campagne aussi bien que nous, c'estoit prudence à eux de la nous quitter pour nous laisser consumer tous seuls avec vn million d'incommoditez qui nous faisoient assez la guerre sans qu'ils s'en messassent. Et quand le temps a fauorizé nos voyages, avec ce que ce temps la n'a esté que trop court,

court, nous auons trouué tant de resistance en eux, & ils nous ont baillé si peu de prise, que nous nous sommes nousmesmes combatus de nostre peine, & n'en auons recueilli que deshonneur à ne rien faire, blasme à faire trop de maux, & brestous nos feux ne nous ont en fin rendu que fumee, à laquelle nous nous sommes estouffez. Nos leues de bouclier ont esté orgueilleuses, mais quant ça esté au fait & au prendre nous n'auons produit que confusion & desordre, dans lequel le party du Roy de Nauarre s'est plustost soustenu qu'esbranlé, de façon qu'il semble que nous ne soyons que les vents qui se rompent à sa constance & à sa magnanimité. Il y auoit vingt ans & d'auantage que i'auois peu apprendre quelle difficulté il y auoit de le ruiner du tout, mais ie ne l'auoy iamais iugé impossible iusques à ces derniers essais que nous en auons faict, en quoy il nous a môstré ou qu'il estoit plus grand maistre que nous, ou qu'il auoit plus d'appuis que nous n'auions de force, ou bié tous les deux ensemble. Ie n'auray point honte de confesser qu'au commencement de ces troubles les grâds preparatifs de guerre qu'on luy auoit dressé me faisoient croire fermement qu'il n'auoit nul moyen de se garentir de nous, si bien que ie sy mon deuoir comme plusieurs autres à y apporter ce qui estoit de mes biens & de ma propre personne, & en quelque lógueur que nos des-

seins ayent esté tirez ie ne desesperoy point pourrât d'un bon succez, mais à ce coup ie suis contraint de retirer mon espingle du ieu, & ouurir à bon escient les yeux pour appercevoir les causes de nostre infortune, & la necessité qu'il y a d'une plus grâd suite de maux dont ce recent icy a faist la premiere, pour le moins la plus apparête ouuerture. Non pas que ie veuille, Messieurs, ressembler à ces oyseaux qui s'esloignent d'un climat soudain que le froid en approche, changeant temerairement de la volonté que j'ay conseruee si long temps avec tant de resolution. Car ie proteste que de toutes les raisons qu'on pourroit imaginer de ceste nouveauté ie ne pren que celle qui me represente la conseruation de l'estat pour laquelle tant s'en faut que ie craigne de perdre ma premiere intention que ie desire plustost me perdre moy-mesme, & vous exhorte au nom de Dieu d'esprouuer si bien mon aduis que vous le puissiez approuuer, & l'ensuiuant monstrier si bon exemple à tout le reste de la France, que puis que vous estes la lumiere qui nous doit esclairer, cest estat recoiue par vostre moyé son enciène splendeur, & ce pauvre peuple accablé, un entier soulagement de ses afflictions.

Et pour entrer en matiere, j'ay tousiours esté pouillé d'un zeile de Religion, & quand il a esté questiô de la deffendre, j'y ay apporté toute l'ardeur qu'on scauroit desirer. Or ceste Re-

ligion ie l'ay tousiours retenüe toute telle que ie l'auoy receüe de mes deuanciers, & comme ie la tiens pour le vray salut de mô ame, ie l'ay preferee à toutes les autres considerations du monde. En quoy i'estoy confirmé, non seulement par cest exēple domestique, mais par la doctrine que vous nous auez tousiours administree, deferant tout ce qu'il m'estoit possible à l'authorité que vous auez de long temps acquise & maintenüe parmy nostre nation. Je n'auray point honte de dire que de ce fait là ie m'en suis rapporté volontiers à vous estimant que vous ne voudriez pas vous damner pour plaisir, & que ie ne pouuoÿ mal faire en vne si bonne compagnie. Et pourtant ie ne me suis point tourmenté de sonder trop auant ces abysses de mysteres & de difficultez esquels vostre escolle est comme plongee, vous laissant la parolle, & me reseruant les decisions de fait, pour faire autorizer quād il en seroit besoing vos decrets, & m'opposer viuement pour ma part à tous ceux qui s'y voudroient opposer, & ce neantmoins souz l'authorité du Magistrat fouuerain, à qui n'ay iamais douté que ie ne deusse toute obeissance. A raison dequoy, i'ay tousiours pensé que nous faisons legitimēt la guerre à ceux qui se bandoient contre vous, & taschoient de subuertir vostre doctrine, les tenant pour vrais heretiques, & Apostats de l'Eglise, avec lesquels il ne faisoit debatre que

la vie, attendu que leurs opiniōs nous en amortissoient la plus grāde partie en nous rauissant par leur peruerfité, ce que i'estimoy que vous nous departiez avec vne sincere & fidelle conscience. Car ie tenoy pour maxime infallible ce que ie vous auois souuent ouy dire. Que nostre Eglise ne pouuoit faillir, & que c'estoit vn erreur digne d'estre poursuiuy à feu, & à sang, que de vous accuser d'erreur. Par ainsi ie n'ay iamais eu autre opinion, sinō que nous auions vn tressolide fondement, & plus que necessaire de persecuer par toutes voyes ceux qu'on appelle de la Religion reformee. Vn titre si audacieux ne me pouuoit plaire, & comme en ces dernierstēps, l'Esprit de Dieu nous menace de plusieurs seducteurs, ie les ay tousiours tenu pour tels, si bien que i'en ay detesté les compaignies, tant s'en faut que ie me soy espargné en tout ce qui m'a esté possible, de les faire passer par toutes les rigueurs dont ie me suis peu aduiser, pour les exterminer. C'est pourquoy ie faisoys beaucoup d'estat de la deuotion que nos Rois y ont à diuerfes fois mōstree. Mais voyāt que ces gens se renforçoiēt, tāt plus nous nous efforçons à les affoiblir, la lōgue experiēce que i'ay de ses affaires, me rend desormais plus retenu en ceste matiere, & la recēte victoire que Dieu leur a donē sur nous, me fait songer qu'il fauorise entieremēt leur cause, & que quelques traueses qu'il leur face receuoir par nos mains

il leur referue neantmoins vne heureuse fin, & pleine de consolation. Le desordre disoit cest ancien, produit les bonnes Ordonnances, & nos fautes reiterees, quād nous les recognoissons, nous font recognoistre la sagesse, voire l'apprentissage de nostre propre perte est plus fort, & pregnant que celuy qui se fait du dommage d'autrui. Et partāt ie me laisse volōtiers emporter, à ce que les effets m'enseignēt pour passer plus outre, non pas pour esplucher tous les poin s contentieux entre les vns & les autres: car ie n'ay pas encore prins tant de peine: mais pour les procedures dont on vse contre leurs biens & leurs personnes. Premièrement il est question de la Religion en laquelle vous estes tous deux appointez contraires en plusieurs articles, & neantmoins d'acord au fondement, qui est vn seul Iesus Christ, mediateur entre Dieu & les hommes, chef vnique de l'Eglise, ie vous prie estce chose qui se doie vider par vos meurtres? mais estce chose qui se puisse ainsi vider? Celuy à qui vous auez osté la vie du corps, comment luy donnerez vous la vie en son Ame? cōment sauurez vous ceux à qui vous ne donnez point le loisir de croire? & comment voulez vous qu'ils croient s'ils ne sont preschez? Ce sont les plantes qu'ils ont acoustumé d'interietter aux poursuites q̄ nous en faisons, & neantmoins cōbien qu'elles semblent equitables, nous leur estoupons nos

oreilles comme si c'estoient les charmes des Sirenes. Mais pourquoy leur refusez vous vne amiable conference pour decider vos differés? Je sçay que vous repliquerez que c'est chose qui est desia aduenüe, & qui neantmoins n'a de rien profité. Mais i'ay apprins des Iuriconsultes, que ce qui est mal aduenü, est reputé pour nul. Car en toutes nos assemblees, les procedures y ont esté imparfaictes, & ie m'en rapporte aux actes du Concile de Trente, & nouuellement du Colloque de Poissy. Quât au premier, il n'en y eust iamais de plus impertinét que celluy là où ils furent condânez sans estre ouys, & ne le pouuoïent estre, veu que leurs parties formees estoient leurs Iuges: outre cela, vous sçauiez encore cōme l'Eglise Gallicane mesme, ne l'a poit en tout & par tout approuué, tesmoins les resultats qui en ont esté faits, sans q'ie parle des oppositions de nos Rois, par lesquelles ce Concile ne peut estre receu pour irrefragable en France, autrement nous montrons nostre iniustice en ce que nous reglons nostre condânation à nostre fantasie, & non pas à la nullité du iugement, qui est indubitablemēt generale iusques à ce que la reformatiō des articles que nous n'adorōs point, il ne s'y puisse trouuer riē à redire. Car c'est se iouer trop ouuertement, que d'en prendre & laisser ce qu'il nous plaira. Et puis que de mesme raison s'engēdre mesme droict pourquoy voulez vous que ceux de ce-

ste religion pretendue reformee, n'ayent pa-
 reille liberté de iugement à la vostre: Quant au
 Colloque de Poissy il me souuient qu'il ne s'en
 faut que bien peu que le principal different du
 sacrement del'autel ne fust appointé, & quād
 nous mettrōs la main sur nos cōsciēces, nous
 trouueront que nos partizans l'interrompirēt
 par vne prudence politique, de peur que la sub-
 uersion de ce fondemēt, n'attirast celle de tout
 l'edifice. De cetemps là, ie iugeoy qu'on auoit
 tres-bien fait de cetenir à l'ancienneté: mais
 depuis me souuenant que leur Ministres plai-
 doiēt leur cause par l'Escripture sainte, & mes-
 mes par leurs anciens Docteurs qui y estoient
 conformes, ie ne puis iuger sinon que pour le
 regard du temps ils ne sçauoiēt estre mal fon-
 dez s'ils verifient leurs allegations, & qu'au cō-
 traire si nous ne parlons que des simples opi-
 nions de nos Papes, qui d'ailleurs n'ont pas e-
 sté le plus souuēt des plus gens de bien du mon-
 de, nous perdrons nostre proces tout content.
 Mais quand ie vous cōsidere de plus pres, i'en-
 tre en plus grande defience: car vous qui faites
 profession d'entendre & d'enseigner les escri-
 tures, auriez vous faute d'entendement pour
 les comprendre, ou de fidelité pour les ensei-
 gner? Ces reformez auroient-ils ce priuilege
 par dessus vous à qui il est acquis de si longue
 main? Seriez vous deuenus semblables à ces sa-
 crificateurs dont parle l'Escripture, parmi les-

quels la Loy est perie: Dieu cacheroit il ses misteres à vostre grâdeur, pour les reueler à leur petitesse? Forgeriez vous bien des cabales au lieu de la doctrine de l'Esprit de Dieu? Les russes du serpent vous auroient elles bien fait reuolter contre vostre Createur? Je ne m'oseroiy imaginer cecy de vous, cōbien que vos aduersaires vous le reprochent assez. Mais i'aymeroy mieux qu'ils s'abstinsent de vous outrager, se contentant d'exposer simplement leur dire, & que vous leur rēdisiez la pareille. Neâtmoins vous estes venus si auāt aux parolles, que nous en auons esté aux mains avec eux pour l'amour de vous, & semble que ses querelles en soient tant plus irreconciliables. En quoy ie trouue que nous auons iusques à present grandement failly, pource que nous auōs plustost appliqué le cautere à la playe que les onguēs lenitifs qui eussēt peut estre apporté quelque soulagemēt. Le mal n'estoit qu'en son cōmencement, & par nos precipitations nous l'auons soudain conduit à l'extremité, si bien qu'au lieu d'appaiser cēs troubles de l'Eglise, nous y auons adiousté ceux de l'Estat, cōme si nostre repos ne dependoit que de la cōfusion: & auons en fin si bien meslé nos cartes, que nous ne scauriōs plus retrouver nostre point. Il a fallu que nous nous soyons tous opiniaستrez en vos opiniaستretez, que pour vous conseruer les vns ayent couru fortune, les autres y soient du tout perdus, que

pour maintenir vos rentes nous ayons despen
 du les nostres, q̄ pour vostre amitié nous ayõs
 eu nos propres parens pour ennemis, que souz
 le pretexte de l'honneur de Dieu, les hommes
 ayent ignominieusement traitté les hommes,
 & bref que la Religion nous aye fait aux insol-
 lences de nos guerres, fouler souz les pieds tou-
 te Religion. Au lieu qu'il estoit plus seant, &
 plus vtile de ramener doucement à la bergerie
 ceux qui s'estoient escartez, nous en auons esté
 les bouchers: au lieu de mōstrer le chemin aux
 desuoyez, nous les auons pouffez dans des fon-
 drieres: au lieu de représenter Ioseph à Iacob,
 nous luy auons monstté sa robe sanglante, tan-
 dis qu'il gemit dās le puits: au lieu d'eslour les
 Anges par la conuersion de ces miserables, no^s
 les auons contristez par leur mort. Or Dieu
 n'ayme pas la mort du pecheur, mais qu'il se
 conuertisse, & qu'il viue. Le saint Esprit parle
 de la mort spirituelle, de laquelle no^s sommes
 cause puis que nous preuenons leur repentan-
 ce par leur ruine. Prenez garde ie vous prie à
 ce que ie vous diray. Quel aduātage auez vous
 trouué à nous conseiller des le commencemēt
 de prendre les armes contre les pretendus re-
 formez? Vostre intention estoit elle pas de les
 exterminuer? & à nous de nous conseruer? Et est
 il adueni ce que vous en desiriez? N'estes vous
 pas ie vous prie coupables de la mort de tant
 de personnes, qui ont à la bonne foy suiuy vo-

stre conseil? En quelle conscience nous faites
 vous mourir, pour faire mourir autrui? N'estes
 vous pas les bourreaux des vns & des autres?
 Ne voyez vous pas qu'au lieu de diminuer leur
 nombre, vous diminuez le nostre? qu'autât d'é-
 nemis que nous perdôs de leur costé, nous per-
 dons autant d'amis du nostre? que nous ne les
 sçauriôs affoiblir sans nous affoiblir nous mes-
 me: Et quel profit y'a il en ceste egalité? Ils vo-
 rendent coup pour coup, assaut pour assaut, ba-
 taille pour bataille, victoire pour victoire, &
 si à la fin vous auez tousiours esté cōtraints d'ac-
 cepter leurs conditions de paix. Toutesfois il
 n'y a eu rien qui les nous aye peu iamais faire
 desmordre: no^r faisons tousiours les vautours
 sur leurs entrailles, qui ne laissent pas pourtant
 de renaitre tous les iours: nous espuisons ordi-
 nairement ce sang qui ne tarist iamais: & qui
 pis est, c'est tousiours en receuant autât de dô-
 mage que nous leur en donnons, consumant
 nos entrailles, espuisant nostre propre sang,
 sans que nous vous voyons iamais tant esmeuz
 tant soit peu de nos miseres, comme si nos tra-
 uaux estoient vostre repos, & nos ennuis vo-
 stre contentement: vous en riez tandis que les
 autres gemissent, & ne cessez de pouffer à la
 roüe de ces malheurs pour asseurer vostre feli-
 cité. Mais ie trouue que nous n'auons point de
 profit en tout cecy, & m'estonne que la longue
 experience que nous en auons fait par l'espace

de vingt ou vingt cinq années nē nous à peu apprendre nostre leçon. Voicy la septiesme guerre ciuile, que nous auons dressé à ses reformez, & nous voicy encores à recommencer. Il est vray que nous auons gaigné des victoires: mais ce n'est que vanité. Si le champ de bataille nous est demeuré, hélas! nous l'auons veu couuert d'une grande partie des nostres, & au retour dans nos tentes, nous auons ouy les gemissemens de nos propres funerailles. Au partir de là qu'auons nous fait, que faire la guerre pour faire la paix? que sont deuenus tous nos desseints, pour exterminer tout ce peuple que nous auons trouué si déterminé à sa defence? Nous les auons remportez dans nos cabinets couuerts de honte & d'infortune: nous les auons bien tost apres recuits, mais ceux qui les ont voulu digerer, n'ont senti que du poison. Et neantmoins nous sommes si enforcelez que nous pensons estre en santé parmy tant de maladies. Il se trouue tousiours de boutefeux pour embrazer nos dissentions, & ceux qui deueroiēt y verser de l'eau, y iettent de l'huyle, du soulfre, & de la poix de peur que le feu ne s'esteigne. Quand i'extermine ces procedures, ie panche du costé de les persecutez, & dans le doute que i'ay encore sur la Religio, ie tiens leur cause pour la seule marque de leur persecution. I'ay appris d'en iuger ainsi d'un passage que ie lisoÿ naguere dans S. Ierosme, iadis vn des

celebres Prestres de Rome'. Celuy, dit-il, suit Christ qui est poursuivy, & celuy l'Antechrist, qui poursuit, ou qui persecute. Non pas que ie vueille iustifier tous les heretique nos Rois ou autres ont attaqué comme les Gots qui estoient Arriens, & nouuellement les Anabaptistes: mais c'estoient des monstres, dont ceux là renuersoient le fondemēt de nostre salut, à sçauoir la diuinité de Iesus Christ, chose intollerable parmy les Chrestiens, & neantmoins la guerre qu'on leur a faicte auoit d'autres fondemens q̃ la Religion. Les Anabaptistes outre les apparens erreurs de la Religion peruertissoient les droicts de la Magistrature: & les vns & les autres estoient vnanimement condānez de la partie de l'Eglise la plus reformee. Car quand aux Albigeois ie me crain, suiuant les anciens memoires que i'en ay recouré, tous cōtraires à ce que nos historiens escriuent, qu'ils n'ayent esté oppressez avec plus d'animosité, que de iustice. Toutesfois ie laisse ses exemples passer, pour venir seulemēt à la raison des choses presentes, Ie trouueray tousiours bon quād nostre Eglise sera repugnee d'Heresies, & d'Heretiques: mais ie trouueray tousiours mauuais quand nous la souillerōs de nostre propre sang & ne puis penser que ces moyens si violēssoient ny legitimes ny suffisans. Iesus-Christ print le foiet pour chasser les changeurs du Temple: mais nous sommes bien loing d'en faire le sem

blable. Car ceux là n'estoient pas ceux qui falsifioiēt la Loy ny les Prophetes; mais ils faisoient mal à propos la bāque dans la maison de Dieu, qui n'estoit destinee qu'à l'Oraison. C'estoit abuser du lieu sainct par les traffiques prophanes, & par consequent ceste punition de Iesus-Christ n'estoit que politique, veu que cependāt il conuersoit ordinairement parmy les Sacrificateurs, les Scribes, & les Pharisiens se trouuāt & disputant en leurs synagogues, sans qu'il ait mis iamais la main sur eux, cōbien que ce fussent les vrais faussaires de la doctrine de Moyses & des Propheties de son propre aduenemēt. Le regne de nostre Sauueur n'est pas de ce mōde, ses armes dont il combat ses ennemis sont spirituelles, son salut ne s'acquiert point par le bras de la chair. Combien seroit il donc plus necessaire de defendre la Religion par la saine intelligence des Escritures, par la reformation de vos vies, par les prieres & saintes deuotions du seruice de Dieu, enseignant les ignorans, opposant les raisons aux opinions, l'ātiquitē aux nouveautez & bref escoutant la voix de nostre Pasteur au lieu de ceux qui se masquent de ce titre pour nous charmer de leurs resueries? Voyla pourquoy desormais ie proteste de me departir de ces cruantez qui nous sont trop ordinaires, & d'en demander pardon au Dieu de misericorde, que ie prie m'esclairer du flābeau de sa parolle dās les abisines de mon ignorāce,

à fin que sans m'arrester à l'apparēce des hommes, ie voye que c'est de la Iustice de ceste cause, pour laquelle ces pauures reformez endurent si longuement, & avec tant de cōstan-
ce tous les tourmēs qu'ō leur presēte. Ils ne s'es-
branlent, & m'esbahy de ce q̄ la perte de leurs
biēs, ne leur fait point perdre leur Religiō. Le
biē doit estre biē grād, veu q̄ tāt de maux ne le
leur peut faire abādōner, & faut biē dire qu'ils
en ont vne bien claire & ample cognoissāce,
veu qu'ils ne le peuuent iamais mescognoi-
stre, quelques esperāces qu'on leur propose de
leurs aises domestiques. Ie les voy refugiez d'un
costé & d'autre, priez de leurs rentes, assiegez
de mille necessitez, & neantmoins ne se bannir
iamais de leurs assemblées, & soustenir patiem-
ment leurs oppressiōs. Or ne sont ils pas si des-
pourueus de sentiment, qu'ils souffrissent tāt de
deplaisirs pour leur plaisir: il faut donc qu'ils y
soyent conuiez, & fortifiez par quelque mo-
yen plus puissant que ce qui est de la fragilité
du monde. Ie me rangeroy volontiers à Gama-
liel pour dire, que siceste Religion reformée est
de Dieu, en vain se tourmentēt les hōmes pour
la ruiner, sinon, elle se dissipera d'elle mēmes.
Toutesfois ie n'arracheray point au Magistrat
son glaue: mais ie voudroy pl'ier le iugement
dans sa teste, affin qu'il discernast les obligatiōs
de son deuoir. Car ce n'est pas tout de faire ce
qu'ō doit, mais il le faut faire bien à propos, cō

me les circōstances des temps, des lieux, & des persōnes, sont ordinairement les regles denoz actions. *Le droit extreme est vne extreme iniure*, disent les Legistes, & avec beaucoup de raison. Il n'y a rien de plus iuste que de punir les rebelles d'un estat, cōme criminels de lēse Maiesté. mais il peut aduenir, que ceste Iustice sera pernicieuse, & par maniere de dire inique. Si tout vn corps de ville, ou de Prouince s'est bandé cōtre son souuerain, quand ils retomberont entre ses mains, il doit preferer la cōseruation de tant de personnes à leur ruine, pource qu'un plus grād bien s'en ensuit, à sçauoir, la cōseruatiō d'une portiō de son Royaume, comme il fust practiqué par Monsieur le Connestable à Bordeaux, & bien souuēt par le Senat Romain sur les mutineries du peuple: au contraire, les violēces de Sylla, & de Marius qui faisoient passer au fil de l'espee & à milliers leurs concitoyens, ont esté detestable, & presque indignes d'estre recitees. Quand le mal est si grād qu'il ne se peut guerir sans danger euidēt, il vaut mieux l'entretenir en la partie debilitée, que perdre le tout: cōme il en aduient à ceux à qui la Paralyfie a saisi la moytié du corps, que les medecins aduisez ne conseillerōt iamais de desioindre de l'autre qui retient quelque santé. Et si ceste consideration est valable simplement aux maladies, à plus forte raisō l'est elle en celles qui sont inueterées de longue main, & volōtiers plus incurables que

les resentes. Ainsi quād vne partie de l'estat est diuisée de l'autre parquelque moyē que ce soit, il se faut biē garder de les faire entrehurter, sur tout, quand ce moyen là n'apporte point d'entiere dissipatiō à tout le corps, & que les parties affectées sont nobles & essentielles. Car en soy la tollerāce d'un mal presque vniuersel, est beau coup plus necessaire que l'essay de son aneantissement quand il excède nostre pouuoir, & que l'egalité est si grande, que le cōbat en doit tousiours demeurer douteux. Et c'est ce que nous pouuōs appeller Maux necessaires, lesquels cōseruez conseruent le suiet auquel ils sont attachez, & doiuent par maniere de dire estre plus curieusement traitez, que la santé mesme. Toutefois ceste similitude peut clocher pour vn regard: car tel mal peut suruenir en vn estat, qu'il sera tresnecessaire d'y opposer le tout pour le tout, & neantmoins tousiours apres auoir esprouuē les plus doux, & les plus amiables remedes. Comme en la Monarchie, il faut hazarder la couronne, & le sceptre contre celuy qui se hazarde de le raurir iniustement. Pourquoy? pource que toute guerre defensiue est treslegitime, & sur tout alors qu'il est questiō du total de vostre estat. Voire qui plus est, vous y estes naturellement obligē, & quand vous y apporterez de la nonchalance, vous trahirez laschement vostre patrie. Ainsi en est il de tout ce qui depend de vostre autorité, & de la conseruation

tion de vos droits, qui doit estre inuiolable.

C'est donc au Magistrat souuerain d'y veiller soigneusement, & de s'y employer hardiment quand il en sera besoin. Mais quand l'Estat demeure en son entier, il n'y a occasion assez iuste, pour faire bander le Monarque contre ses suiets: tant s'en faut qu'il se puisse couvrir du voile de Religion pour les opressions de son Royaume, quelque diuersité qu'il y ait, sur tout qu'ad le nombre du parti separé, est inuincible, & que la tolerace peut estre manifestemēt occasion du repos. Et pourtant quand ces pretendus reformez seroient les plus damnables heretiques du monde, attēdu leur grāde multitude, les bonnes villes, & presque les bōnes Prouinces qu'ils occupent, les puissants & valeureux chefs qui les supportent, c'est vainement entrepris à nous de les attaquer pour n'en rapporter que les marques de leurs courages, quelques forces estrangeres que nous ayons eu pour nostre support, combien que iusques à present ils nous ayēt resisté avec le seul party qu'ils ont en France. Ainsi nous sommes bien loin de les ruiner tant soit peu quand ils auront en main leur armée d'Allemagne. Mais encore ne pourroiet ils pas estre reiettez du milieu de nous, qu'avec vne extreme inhumanité, puis qu'ils nous sont cōioints la plus grand part de cōsanguinité, & generalemēt par la cōmunauté qu'ils ont avec nous d'une mēme patrie. Nous sommes bien

loin de nous conformer aux Israelites, qui souffroient les Iebusiens dans Ierusalem, par vne equitable permissiō de Dieu, cōbien qu'il y ait plus de proportiō, sans cōparaison, de nous avec les Reformez: ou bien à Theodose le grād, qui endura pendant son Empire, cent sectes diuerses de la Religion, au dire d'Epiphanius & de Tertullian, Docteurs Ecclesiastiques, dignes de foy: mais principalement les Arrians, que trois ou quatre Empereurs deuant luy auoient desia fauorisé, lesquels estoient fondez, & en la prescription du temps, & en autorité de huiēt cōciles, ausquels leur heresie auoit esté cōfirmée depuis celuy de Nice, & nommément au Concile d'Arimini, où six cēs Euesques soustindrēt l'Arrianisme, & trois personnages seulement, firent ferme pour la verité. Neantmoins Theodose ne laissa pas de perseuerer constamment en sa Religiō, en laquelle il fit instruire ses enfans, & par ce moyen affoiblit plus l'Arrianisme, qu'il n'eut sceu faire par la violence des Edits qu'il mit en surseāce. Je ne veux point prendre l'exemple du Turc, qui maintient toutes sortes de Religions, à fin que ie maintienne les Chrestiens dans le Christianisme, tant y a qu'il en assure d'auātage sō estat, pource qu'un chacun estant bien aise de sa liberté, ne se soucie de troubler celuy qui luy accorde sō repos. Voyez seulemēt l'Alemagne, & la Pologne, il ny a riē de si bigarré en religiō q̄ ces peuples, & neant-

moins ils s'vnissent tousiours à leur commune
 paix, & ces opinions diuisees ne diuisent point
 leur estat. Quant au Roy Catholique, il a dés le
 premier comécemét si bié estably son inquisi-
 tió que ces Reformez n'ót pas eu grád moyen
 de s'establiir en Espangne, & quant au país bas,
 il n'en est pas encores venu à bout, au grád de-
 triment & cõfusion de ses affaires, quelque bõ-
 ne mine qu'il face. Mais Dieu luy a donné cest
 os à ronger, de peur qu'il n'employast ses gran-
 des richesses à la dissipation de quelque voisin,
 ce qu'il eut peu faire assez aisémét avec le thré-
 sor incroyable que ceste guerre de Flandres luy
 a consumé. Je croy cependát qu'il ny a nul d'en-
 tre vous qui n'aye horreur des maux infinis dõt
 il est causé par son opiniaistreté, pource q nous
 iugeons plus librement d'autrui, que de nous
 mesme, selon le naturel amour que nous nous
 portons. Et de fait nous en auons eu pitié, tes-
 moin les troupes Françoises qui y ont esté con-
 duites à diuerses fois, & nouuellement celles
 que feu Monsieur y amena, cõbien que le tour
 aye tresmal reussy, & pour nostre honneur, &
 pour le profit de ces pauures tyrannizez. Tant
 y a qu'en apparence nous auons tousiours mō-
 stré le regret que nous conceuions de leur deso-
 lation, & pourtant quelque contrarieté de Re-
 ligion qui fust, n'a pas empesché que le Catho-
 lique François n'aye accouru à leur secours.
 Neantmoins nous auons tousiours cõuertí nos

fureurs cōtre ceux du mēme party parmi no^r.
 Ainsi diuerſement, les vns ont eſté aydez de
 nous, & les autres oppreſſez, voire ceux à qui
 nous eſtions le plus obligez de douceur & de
 courtoisie. Je ne veux pas dire que le principal
 but des Catholiques aye eſté de ſecourir les
 Reformez en Flandres, eu eſgard ſimplement
 à leur Religion: mais ie pretens auſſi monſtrer
 qu'ils ont autant de raiſon, de maintenir leurs
 cōpatriotes qui ſe couurent de ſemblable Re-
 formation, comme de ſecourir les eſtrangers.
 Pour ceux cy, ils ſe ſont propoſez la charité en
 uers leurs voiſins, la hayne de l'Eſpagnol, & le
 deſir de ſa ruine, & n'auons pas craint de faire
 que les Catholiques fuſſent proteſteurs des
 Reformez à l'encontre des Catholiques, & fai-
 ſons cependant conſcience de faire pareille
 courtoisie aux noſtres contre nous mēme, qui
 nous ſeroit beaucoup plus facile, & d'ailleurs
 ſans comparaïſon plus profitable & aduanta-
 geux veu que de là depend la conſeruation &
 ſplendeur de noſtre eſtat. Voila ce que ie vous
 diray pour le preſent ſur ceſte matiere, vous
 ſuppliant, Meſſieurs, d'examiner mes raiſons,
 & y adiouſter celles que voſtre prudence vous
 fournira, à fin que nous procurions tous la re-
 ſtauration de nos affaires. Je vous exhorte au
 nom de Dieu, d'entrer en ſi grande conſidera-
 tion de nos miſeres, & de la difficulté, ou plu-
 ſtoſt impoſſibilité de nos deſſeins, q̃ nous nous

resentions en bref de quelque tranquillité apres tant d'orages, seruant au Roy de fidelles conseillers en cest endroit, cōme le deuoir de vos charges vous y oblige. Le Royaume de Iesus-Christ est destiné aux troubles. Il est vray: mais malheur à ceux qui en sont cause. Ce n'est poit aux brebis de ce sacré Pasteur, de faire les Loups: à qui Iesus Christ mesme recommande la Paix, de faire la guerre aux enfans de Dieu, de meurtrir leurs propres freres. Mais ie m'adresse seulement à vous, Messieurs, que ie reconnoy pour le principal ressort, qui donne au iourd'huy tel mouuement, qu'il vous plait, à nos affaires. Considerez que c'est à vous de vous rendre mediateurs de toutes ces diuisions si funestes pour reunir sinon en Religion pour le moins en paix tous ces partisans si acharnez les vns contre les autres. Iusques à present vous vous estes contentez de ieter les flambeaux en l'êtredeux de nos armées, & soudain vous estes retirez en lieu de seurté à la façon de ces anciē prestres Romains. Il faut meshuy accourir pour les esteindre: car autrement vous y perdrez tous les iours de vos plus grāds supports, & serez à la fin si foibles, que ceux que vous estimez les plus foibles, vous ferōt la loy. Vostre force ne depēd que de la paix au lieu qu'en la guerre outre cequ'une infinité de deniers du clergé est rauie par ces Reformez, ceux qui vous restēt en core se perdent en lair, & ne seruent qu'à en-

graisser ceux qui souz ombre de vous fauorizer, ne cherchent qu'à gagner leur vie. Nous auons beaucoup d'exemples de nos Papes, qui ont tousiours moyenné la paix entre nos Rois & l'Empereur, ou l'Anglois, qui n'estoient que guerres estrangeres, à plus forte raison en deuez vous recercher le chemin en ses dissentiós ciuiles & domestiques, qui sont les plus insupportables, & les plus odieuses du monde. Quicóque dira à son frere Racha, est luy mesme maudit de Dieu: & que ferez vous si vous batissez non pas de parole seulement, mais aussi d'effet la dissipation de vos prochains? Et quelle douceur attendez vous de Dieu, si vous estes si cruels aux hommes? si cruels dis- ie, à vous mesmes? Je parleray franchement à vous, Messieurs, ie ne crains que si vous continuez ceste vie sauuage plus longuement, il ne vous en aduienne comme à Esau, & que vous perdiez l'aduantage de vostre primogeniture, faute d'estre dans la maison de Dieu. Cartandis que vous poursuiuez ces reformez, vous estes comme dans les deserts, où vous courez assechez de leur sang, & ne vous souciez pas cependant de rendre le seruice à vostre Pere celeste, & si ie ne me trompe, vous trouuerez à vostre retour la porte de sa misericorde fermee: vous serez cognus, mais non pas recogneus pour ses enfans: & finalement ces cruau- tez heriteront cruauté, ces oppressions op-

pression, ces iniquitez vangeance. Prenez y garde, Messieurs : car encore que vous trompiez les hommes, vous sçavez que Dieu void iusques dans voz cœurs, & que tous vos secrets luy sont ouuerts. Ne permettez point que la Religion serue de belier aux demolisseurs de cest estat: & comme les plus courtes folies sont les meilleures, contentez vous d'auoir conduit les choses au desespoir que nous les voyõs à present & tandis qu'il y a quelque apparence de se pouuoir remettre, ne remettez point ce pouuoir à plus grande longueur, de peur qu'il ne s'escoule par la violéce de nos malheurs. Car quant à la Ligue, à laquelle vous auez presté ce masque de Religion, cõsiderez que vous nourrissez l'aspic qui vous tuë: c'est de la Cigue que vous auez aualé, & qui vous fait mourir sans sentimét. Ne vous resouuenez vous point que dès qu'elle se declara, vous ne fustes point mis en ieu? Et de quelle Religion se pouuoient souuenir ceux qui n'auoient desseigné que toute impieté? Ceux qui n'en vouloient qu'à la propre personne du Roy, qui est vostre chef & protecteur, & à son estat pour en disposer à leur fantasie, pouuoient-ils vous appeller à garand de leur rebelliõ, vous qui ne preschiez qu'obeissance au Magistrat? Les aueugles voient clair en cecy, cõc en plain midy. Ces effrontez ne pensoiét rien moins qu'à la Religion, la mort du poinct du Seigneur, & le pillage de sa

couronne, estoit leur but. Tefmoin les entreprises sur les meilleures, & les plus Catholiques villes de France, sans qu'ils ayent remué parmy les reformez, ni attenté à rien qui leur attouche. Et c'est merueille? qu'estant si animez comme ie vous ay veu du cōmencement contre ces perturbateurs du repos public, vous vous soyiez ennyurez de leur hypocrisie, cōme vous auez fait, combien que vous ne leur serviez que de voile, & à bien dire, vous portez la marotte en la tragedie qu'ils ioient sur le Theatre de la France. De quelle protection auez vous besoin, quand personne ne faisoit semblant de vous assaillir? Mais qui leur auoit doné ceste charge, par dessus vostre souuerain? Auoit il besoing d'estre contraint à vostre defence, laquelle il a tousiours si volontairement entreprise? Mais ne pouuez vous point estre defendus que par la voye de la guerre? N'auiez vous point essayé celle de la paix par quelques ennees? Et quel defaut y auez vous trouué? N'estoit-il pas possible de viure en continuât ces belles erres, sans qu'on fist mourir tant de monde? Nous auons veu toute la France auant ces derniers troubles si bien pacifiée, que le discord des Religions n'empeschoit nullement la concorde des vns & des autres: le commerce y estoit commun, les allees & les venuës libres en tous les endroits du Royaume: quel detrimēt vous en est il aduenu? En quoy estiez

vous troublez? Qui vous a molesté, ni en vos biens, ny en en vos personnes? N'avez vous pas iouïy des rentes Ecclesiastiques au beau meillieu de ses prétendus reformez? N'avez vous pas beu & mangé ensemble sans aucun outrage? Et qui s'est iamais plaint de ce contentement? Quant à ces reformez, lequel d'entr'eux a refusé durant cetemps là, l'obeissance que le subiet doit à son Prince? Qui l'a defraudé de ses droits Royaux? Quelle imposition de subsides ordinaires ont-ils reietté? Qui d'entr'eux n'a suiuy le cours accoustumé de la Iustice? Qui a conspiré contre l'Estat? Vous confesserez, Messieurs, qu'il n'est point venu faute de leur costé, & s'ils ont failli en l'observation de leur Religion, ça esté du consentement du Roy & de toutes les Cours souueraines de ce Royaume, du consentement, di-ie, iuré si solennellement, que son infraction semble rendre leur cause meilleure. Non pas que i'en attribue la coulpe au Roy: mais seulement à ceux qui l'ôt par leur violence reduit à ceste extremité, de rompre sa parole pour rôpre leurs pernicieux desseins, & de se tourner vers ses rebelles, pour destourner sur innocence de ces paisibles, l'orage qu'ils auoient esmeu à l'encontre de luy. Ainsi ceux qui sont en peril de naufrage, abandonnent leur propre bien pour soulager le vaisseau, combien que ceste volonté contrainte, ne laisse point d'estre volonté, puis que

les premiers mouuemens sont en celuy qui l'exécute. Mais ie me deporteray d'entrer plus auant dans les considerations que le Roy peut auoir eu pour se contredire luy mesme, & diray neantmoins librement, qu'il ne fit iamais rien tant au desauantage de son estat, dont il a des preuues fort euidentes, & Dieu se vueille contenter du passé retirant sa main de dessus son peuple, & nous laissant expirer de ses oppressions. Et de fait vous sçauiez les peines qu'on a eu de l'y faire resoudre quelque sollicitation qu'en fissent les pensionnaires des Ligueurs aupres de sa personne. Ce clair iugement voyoit la consequence pernicieuse de ceste association : mais il manquoit d'appuy pour le soustenir, veu que les principaux officiers de son Conseil, qui auoiēt obligé biē auāt la foy à ses presces, ne cessoient de l'esbrâler. Je n'en ay pas tousiours eu telle opiniō, & me suis longuemēt fait à croire, qu'ē ceste inconstance cōsistoit la fermeté de nos affaires: mais ie suis cōtraît d'estre moy mesme volage par maniere de dire, & faire indiuorce avec la vanité pour esprouuer la raison. Car puis q̄ le Roy sçauoit tresbiē qu'il n'estoit questiō q̄ de son estat, il ne deuoit faire difficulté d'appeller aupres de sa personne, ceux qui y ont plus d'interest, cōme les Princes du sâg, & leurs forces, pour le moins à l'extremité, suiuant les offres qu'ils en fîrēt. C'est le moyē de faire reprouuer les insolentes.

procedures de ces brouillons, qui peschent en vostre eau trouble, & se seruent de nos confusions pour leur establissement. Car le peuple eut aisément iugé, qu'il n'y alloit à la verité que de l'Estat, puis que le Roy se fut estanconné des colônes de l'Estat, sans se laisser abatre au vent de la Religion, combien qu'une partie de ses Princes du sang, n'en ayent point d'autre que la sienne: & ceux qui en font profession d'un autre, sont si affectionnez au service de la courône, & particulièrement au sien, qu'ils n'eussent nô plus mâqué d'effet que de volonté. N'y auoit il pas plus d'apparence qu'il se deust rallier avec ceux cy, qu'avec les Ligueurs, c'est à dire, avec ses amis plustost qu'avec ses ennemis? avec les François, qu'avec les Lorrains? avec sô propre sang, qu'avec ces bastards? avec les vrais officiers de la couronne, qu'avec ceux qui luy faisoient de si mauuais offices. Les Romains ont tousiours appaisé leurs querelles domestiques, pour s'accorder contre ceux qui les attaquoient, soit les Gaulois, soit les Toscâs, soit les Carthaginois. Autât en firét les Espagnols, quâd le Roy François premier leur embla le royaume de Nauarre, pèdât qu'ils se reuoltoiét còtre l'Empereur Charles le quint. La descente de l'Anglois au Haure de Grace, en l'an 62. fut cause de la reunion des François pour l'en dechasser. Et quâd nous auons veu ces monstres de Lorraine ravager nostre patrie, il a fallu se ioindre à eux,

pour les aider à nous ruiner nous mesmes.
 Qu'auôs nous fait de ceste ancienne vertu Frâ-
 çoïse, qui alloit combattre son ennemy iuf-
 ques dans sa maison, au lieu que nous l'appel-
 lons maintenant, nous le receuons chez nous,
 nous le nourrissons, nous le flattons, & luy a-
 uons tant plus d'obligation, qu'il nous fait de
 mal? Ce peuple qui a iadis triomphé des Em-
 pereurs, des Solymâs, des Sarrazins, des Gots,
 des Normans, des Angloïs, n'a peu soustenir v-
 ne poignée de Guisars, & ce sceptre releué sur
 vn million de trophées, s'est baissé deuant ces
 mutins, peu s'en faut qu'ils ne l'ayent foulé aux
 piedz. Tout l'honneur de vaillance & de cou-
 rage, qu'en l'espace de douze cens années nos
 predecesseurs auoyent acquis, & conserué,
 nous l'auons miserablemēt perdu en vne heu-
 re, & ces lions qui ne redoutoient point les
 taureaux, se sont effrayez au simple chant d'vn
 coq. Je cōpare nostre estat à ce rocher dont par-
 le Plin, qui ne s'esbranle point quand on le
 pousse de tout le corps, mais seulement quand
 on le touche du doigt: ou bien plustost à ceste
 forte de pierre, qui nage entiere sur l'eau, &
 brisée s'enfonce. Tout le monde par maniere
 de dire n'a peu faire crouler la France, & ces
 potirons la renuersent: nous auons tous ense-
 mble nagé sur les flots d'vne infinité de guerres
 estrangeres, & nos diuisions nous plongent.
 Il semble que ce miserable royaume soit en sa

dernière vieillesse, & cōme cest ancien deu
 iugea par le bruit des cossons qui rogeoient les
 poultries, la ruine de la maison où il estoit, nous
 pouuons hardiment dire que nostre cheute est
 prochaine, puis que ceste vermine ne cesse de
 nous consumer. Quoy donc? faudra-il que les
 François deuiennent estrangers les vns aux au-
 tres? Mais se peut il bien trouuer des ames si
 desloyales, qui veillent abādonner le vray tige
 de S. Loys pour embrasser ces iniustes vsurpa-
 teurs de leur droit? Ceux qui sōt nos superieurs
 legitimes, depuis 360. anneés qu'il y a du regne
 de ce chef de leur race S. Loys, qui tire neant-
 moins son extraction depuis Merouee, à ceux
 que nous ne cognoissons point il y a 50. ans?
 Porterōs nous sur nos espaules, & sur nos bou-
 cliers, ceux que l'indignité & l'iniustice tien-
 droit tousiours collez contre terre? arracherōs
 nous ces beaux reiettons de la fleur de Lys qui
 nous restent pour enter en leur place ces ar-
 brisseaux sauuages qui ne rapporterōt que des
 espines, comme ils ont commecé? Hé! qui peut
 souhaitter cest horrible changement? Car c'est
 la seule raison qui nous deuroit faire detester
 l'ambition de ces brouillons. Ils aspirent à la
 couronne, mais ils n'y peuent paruenir que par
 le meurtre, & le carnage d'un milliō de person-
 nes: ceux qui les soustiennēt le plus, sont taillez
 d'y succōber les premiers: ceux qui s'imaginēt
 d'obtenir les grandeurs par leur moyē, n'aurōt

peut estre pour toute recompense, que la perte
 de leur vie. Bref il faut cōbler les sepulchres de
 charoignes pour cōbler leur ambition: les mō-
 ceaux de leurs partizans accablez, sont les de-
 grez dont ils eschelleront le ciel. N'est ce pas
 pour auoir horreur de ces cruautez? Pour cra-
 cher au visage de ces effrontez qui nous pipent
 nostre liberté? Pour honorer ceux qui peuuent
 paisiblement & sans desordre monter au som-
 met de l'autorité que les loix du royaume & du
 merite leur ont acquis? Touchons hardiment
 la principale corde de ce ieu, & puis que ces
 gens ici n'ont point hôte de faire, n'ayōs point
 honte de parler. Les Guyfars veulent enuahir
 ce royaume, au preiudice de la maison de Bour-
 bon, chacun le sçait, & n'y a rien si commun en
 la bouche du peuple. Pourquoi? pource que le
 Roy de Nauarre qui est le plus proche, & Mō-
 sieur le Prince de Condé sont de la Religion
 Reformee, & par conséquent Heretiques. Je
 suis marry que ie ne suis grand Docteur, pour
 m'esclaircir du point de ceste heresie qui leur
 est si souuent reprochee: mais il me semble que
 les principales disputes de ces Reformez, ne
 tendent qu'à faire plus valoir la simple parole
 de Dieu que les traditions des hommes. C'est
 là où ils nous rappellent, & croy qu'ils ont be-
 aucoup de raison, & que nous ne sommes pas
 assez couuerts du manteau de l'Eglise, pour es-
 timer que ce titre specieux épesche les erreurs
 en effet. Il n'y a riē de si aisé à corrompre, que les

mysteres de la Religion. Je m'en rapporte à la
 famille de Noé, qui estoit si saintement instrui
 te, & d'où neantmoins est procedee toute l'I
 dolatrie des Chaldéens, & consequemment de
 tout le reste du monde, horsmis ceux que Dieu
 s'est reserué pour sô peuple: mais encore ie m'é
 rapporte à ce même peuple. Y a il iamais eu
 rien de si fragile que ces miserables? D'où ve
 noient ces 400. faux prophetes, contre vn seul
 Michée? Ces adorations aux lieux hauts? Ces
 superstitiôs execrables ausquelles ces libertins
 se desbordoient? Et n'a iamais esté autrement,
 que la verité n'aye eu sur le poinct de son iour
 les tenebres de Mensonge à l'opposite: & si ie
 m'osoy licentier de parler outre le vulgaire,
 c'est la verité qui produit necessairemēt le mé
 songe, ne plus ne moins que la lumiere neces
 sairement produit l'ombre. Voila pourquoy
 tout aussi tost que Iesus Christ s'est porté pour
 le fils de Dieu, on l'a tenu pour blasphemateur,
 & tout le discours de sa vie ne sembloit à ces a
 ueugles, qu'une farce pleine de risée: aussi tost
 que les Apostres ont presché la pure doctrine,
 le diable a semé ses impuretez. Voire nul ne les
 a plus chassés du tēple de Dieu, que ceux qui
 se disoiēt estre le tēple. S. Pierre eut en teste Si
 mon le Magicien: S. Iean eut Cerinthe, & con
 sequemment l'Eglise à eu pour aduersaires di
 uers heretiques, cōme Ebion, Basilides, Mar
 cion, Montanus, Carpocrates, Sabellique, &
 vne infinité d'autres, qui ont tous pour la plus

part tascché de renuerſer le fondement de noſtre ſalut Ieſus Chriſt. Et non ſeulement l'Egliſe n'a iamais eu faute d'exercice contre ſes ennemis: mais ie trouue qu'elle meſme s'eſt trouuee bien ſouuēt outragee de ſes domeſtiques. Nouatian Preſtre ne vouloit point que les reuoltez fuſſent receuz à penitence, & occaſionna vn grand ſchiſme en l'Egliſe, avec l'aide de Nicoſtrate preſtre de Carthage. Samofatene eſtoit Eueſque d'Antioche, & renouella les erreurs des Ebionites. Arri^e eſtoit Preſtre d'Alexâdrie, qui fut en ſon hereſie aſſiſté de pluſieurs autres Eueſques & des Empereurs, voire depuis, & longuement de pluſieurs nations. Or ſi en ces commencemens les trahiſons de ceux qui ſembloyent ſeruir Dieu, ont eſté ſi grâdes, il n'y a point de doute que cẽ mal ne ſe ſoit touſiours gliffé & entretenu dans l'Egliſe. Et quand vous y aurez bien penſé, peut eſtre iugerez vous que vous n'eſtes point exẽps de quelques corruptions: mais ie me tay, de peur d'encourir voz cenſures. Toutefois ie ſuis marry que vous ne faites iamais vuider le procès que les Reformez vous en ont intenté, & qui eſt ſur le bureau il y a lōg temps, & qu'il faille que nous croyons plus les vns que les autres, ſans plus grand cognoiſſance de cauſe: & nous ne ſerions plus en peine de ſçauoir ſi ces deux Princes ſont Heretiques. Neantmoins poſons le cas qu'ils le ſoient (ce que ie preſuppoſe difficilement & ſans preiudice

ce de leur repliche) vous appartient-il, à vous
soustraire de leur obeissance? C'est chose qui ne
vint iamais en fantasie aux Chrestiens de la pri
mitiue Eglise, cōtre les Empereurs Ethniques,
ausquels ils se soumettoient en ce qui est de la
magistrature Pollitique, combien qu'on n'eut
sceu voir plus grande difference de Religio. Se
reuolterent-ils souz Constantin le grand, qui
fauoriza à la fin Arrius? contre Licinus? contre
Iulian l'Apostat, contre Valentinian, & contre
tant d'autres qui les tyrannisoient en l'exercice
de leur religion? Or le Roy de Nauarre est bié
loing de nous faire le sēblable, car il n'est pas
encore paruenū à ce que nous craignons: ainsi
nous criōs mal à propos deuāt qu'on nous frap
pe. Non pas que la prenoiāce ne soit en effet de
la prudence: mais pource qu'en vain se mesloit
on de preuoir ce qui ne se peut ny doit euter.
De quelque façon que Dieu nous donne les
Rois, il les faut souffrir: & n'y a loy n'y exēple
legitime au monde, qui nous enseigne de faire
autrement. En quoy il sembleroit que les Re
formez se cōportent mal, puis qu'ils prennent
les armes cōtre leur Souuerain pour maintenir
leur Religio. Mais outre ce qu'ils font iustemēt
fondez sur la defensiuē souz l'authorité du ma
gistrat, & qu'il n'y a riē si naturel que de repous
ser la violēce, ils alleguēt d'ailleurs d'autres rai
sons perēptiores, qu'ils nous ont fait entendre
assez souuent, & ne tient qu'à nostre diligence

50

que nous n'en soyōs suffisammēt instruits. D'a
uantage la façon dont le Roy de Nauarre, &
Mōseigneur le Prince ysent à l'endroit de nos
Catholiques, vous en doit faire esperer tout bō
traictemēt, quād nous en serions venus iusques
là. Premieremēt le Roy de Nauarre maintient
de tout temps la Religion Catholique en son
Royaume, qui est la Basse Nauarre, à sçauoir, v-
ne portiō de toute la Nauarre, dont l'Espagnol
luy detient iniustement le reste qui est de la les
mōts Pyrenees. Ce que ie vo^r puis tesmoigner,
cōme l'ayāt veu de mes propres yeux, m'y estāt
trāsporté il y a deux ans par curiosité, pour sça
uoir si ce qu'on m'auoit fait entēdre au cōtrai-
re estoit veritable. Bien est vray qn'en son païs
souuerain de Bearn, les affaires y sont autremēt
disposez: mais c'est d'autant qu'en son aduene-
mēt il les trouua en ceste sorte, & si biē establis
par l'espace de quelques annees du viuant de
la feuē R oyne de Nauarre sa mere, qu'il estoit
difficile voire impossible d'y apporter du chā-
gement, qui est tousiours pernīcieux quand le
bien n'en est poiut apparēt. Au reste sa maison
est pleine de Gentilshōmmes Catholiques, qui
sont à son seruice, iusques aux plus priuez & sei-
gnalez officiers, & n'a iamais fait difficulté de
receuoir avec beaucoup de courtoisie ceux qui
s'y sont presētez. Ce n'est pas signe qu'il en vou-
lut yser d'autre sorte quand il paruiēdroit à nō-
stre estat, & ie ne me seruiray que d'une raison

tiree de la verisimilitude, voire, si ie ne me trô-
pe, de la verité. Il n'y a point d'apparence que ce
Prince se voyât esleué sur ce throsne, iettaist les
yeux que sur le repos, apres tât de trauaux qu'il
a souffert, tant s'en faut qu'il recherchast les oc-
casions de faire la guerre à ses suietz, l'affection
desquels il aymeroit mieux captiuer q̃ les estrâ-
ger, de façon qu'il aura tousiours à gré quand
son peuple se maintiendra dans sa Religion ac-
coustumee, pourueu que le semblable luy soit
aussi permis par l'insolence de ces esceruelez,
qui ne cherchét qu'à troubler l'eau pour en bail-
ler le blasme aux agneaux, & ne māquer point
d'un pretexte de les deuorer. Il pourra tous-
iours considerer, que le party des Catholiques
est tresbien appuyé, que si le sien a esté inuinci-
ble, l'autre ne sera pas moins, & par ainsi qu'il
aura meilleur marché de le maintenir, que d'at-
tirer sur son estat la malediction du peuple, &
sur sa conscience la ruine d'iceluy. I'aiousteray
que les autres de sa maison qui sont Catholi-
ques y ayāt tant départ, il en sera plus soigneux
en leur faueur. Mais quoy? nous debattons de
la chappe à l'Euesque, cōme lon dit, & parta-
geons mal à propos l'heritage d'un viuant, qui
suruiura peut estre à tous ceux qui disputēt de
ce qui aduiendra apres sa mort. Et semble que
nous deuisions les trames de sa vie à nostre ap-
petit: mais comme il n'estoit pas permis d'es-
mouuoir ceste question, il est permis de la re-

foudre, à fin d'oster ces scrupules à ceux qui en
 apportent du preiudice au repos & au bien pu-
 blic. Et à la verité c'est se plaindre de teste sai-
 ne. Vous voyez de fait que les troupes du Roy
 de Nauarre sont aujourd'huy meslees des vns
 & des autres, & que la concorde regne parmy
 eux, au lieu que le moindre des leurs qui pa-
 roist entre nous, il le faut emprisonner, il le faut
 rançonner de tous ses moyens, & finalement il
 luy faut faire porter le suppice de la mort qu'il
 n'a point merit  . Ce sont des m  stres il les faut
 estouffer, & sommes bien souuent contrains
 d'outrager nos propres amis, pour assouuir la
 rage de ses ennemis de l'estat. Je s  ay bien que
 les plus malicieux d'entre nous ont accoustu-
 m   de brocarder ceste facilit   du Roy de Na-
 uarre, c  me si c'estoi  t les amorces d  t il nous
 veut attirer dans ses filets: mais on ne s  auroit
 iamais si bien faire que tout le monde le trou-
 uast bon, il y a tousiours quelque chose   redi-
 re, & faut que les fantasies des hommes se ge-
 nent pour leur plaisir. Que seroit ce donc s'il se
 fut dez le commencement rang   de nostre par-
 ty, abandonner sa religion pour nous c  plaire?
 On eust volontiers dit que c'estoit pour nous
 c  plaire, qu'il se deguisoit    propos pour nous
 tr  per, qu'il eust est   Catholique en exterieur
 & Reform   en sa consci  ce, qu'il n'auroit pas
 despouill   sa vieille peau, qu'il s  tiroit encore
 le fagot, qu'il faudroit attendre sa pers  uer  ce

pour ſçauoir ſi l'on ſ'y deuroit point fier: bref le pauvre Prince eut bien eſté loing de ſon cōpte. Et à la verité c'eſtoit le ſeul moyé de le deſarçonner tout à plat: car les Reformez preten-
 dus ne ſe fuſſent plus aſſeurez en luy, & euſſent iouié leurs perſonnages à part: les Catholiques ne ſe fuſſēt pas iettez entre ſes bras du premier coup, & peut eſtre point du tout. Et quād les Chefs de la Ligue ſeront deuant leur confeſſeur ils diront qu'ils ſeroiēt bien marris ſils penſoient q̄ les Catholiques ſe deuſſent ranger de ſon coſté: & m'aſſeure qu'ils eſſayeroiēt ſoudain d'ētrer en l'autre, cōme ils ont fait autres-
 fois, à fin de faire vn fonds à leur ambitio. Tāt y a q̄ le Roy de Nauarre n'en pouuoit receuoir ny hōneur ny profit quelconques. Et partant ie ne trouue pas qu'il ſeroit bien conſeillé quand il ſ'y reſoudroit, pour ne perdre point le party qui luy eſt deſia aſſeuré, & pource que cela ne peut nullement empêcher ceux qui n'affectiō-
 nent que l'eſtat, de ſe ioindre à luy, cōme à fait nouuellement Monſieur le Conte de Soifſons. Et puis de quel coſté qu'il puiſſe eſtre, la diſpoſition preſente de ſes affaires, luy fournira touſiours d'ennemis, il luy eſt plus ſeant d'eſtre conſtant en ce qu'il tient des ſon enfance, que ſ'enfonter legerement dans des nouueau-
 tez & pernicieuſes & incertaines. Je diray bien d'aduantage que le moindre ne doit iamais faire la loy au ſuperieur, & ſauf la perſonne

du Roy, que ietire hors de mon propos, il est plus raisonnable q̃ tous les François s'eforcēt de se cōformer au Roy de Nauarre, q̃ luy de sa baiſſer à leur discretiō, & ployer à leurs violēces: sa dignité & son courage à mon aduis, sont incōpatibles de ces ignominies qu'ō luy pourchasse, & de ces rigueurs qu'ō luy veut tenir. Il l'a tousiours mōstré, mais à present plus que ia mais. Vous voyez la nouuelle benediction que Dieu luy a faite en nous baillāt entre ses mains & si ses forces estrāgeres se ioignēt vne fois avec luy, sa prudēce, sa valeur, sa dexterité nous chaufferōt les ēsperōs de biē pres. Il est pourtāt tresnecessaire, que vous vous disposiez à preuenir les malheurs q̃ Dieu nous prepare en la rēcōtre de ses armees, dōt le hazard ne peut estre que dōmageable au Roy. S'il obtient la victoire, sera tousiours avec vn horrible carnage de ses subiets, & s'il la perd, son estat est perdu, & peut estre n'aurōs nous pas apres tāt de faueur des vainqueurs cōme nous desirerions. Aduisez qu'il ne nous aduienne comme aux Tyriēs, lesquels pour n'auoir voulu receuoir les honnestes compositions qu'Alexandre leur presentoit, furent en fin prins d'assaut, & cruellement traictez. Ou bien plustost deuancez ces Reformez en ce bel œuvre de compassion, leur offrant l'vnion, & la concorde telle que vous l'auiez eue par cy deuant ensemble: mais plustost suyuez en cela leurs brisees, veu que des

le commencement il n'ont crié ny désiré autre chose q̃ le chemin de se reioindre avec nous, à sçauoir vn Concile legitiment assemblé, où les points de vostre Religion fussent debattus par les Esçritures, & non pas par les opinions, par la raison, & nō pas par la furie, par les douceurs de l'amitié, & non pas par les amertumes devoz haines. Et n'alleguez point que c'est chose faite, comme ie disoy tantost: car le Concile de Nice, qui fut le premier Cōcile general depuis les Apostres, en l'espace de 300. ans ou enuiron, n'espescha point qu'on n'en conuoquast d'autres selon les exigences du fait, cōme celuy de Constantinople, contre Macedonius Euesque de la mesme ville, qui nioit la diuinité du S. Esprit: celuy d'Ephese contre Pelagius, & Nestorius Euesque de Constantinople, qui nioiēt la diuinité de Iesus Christ, celui de Chalcedoine contre Eutyches, prestre aussi de Constantinople, qui confondoit les deux natures en Iesuchrist: le second Concile de Constantinople contre Anthemius euesque du mesme lieu, qui nioit que la vierge Marie eut enfaté Iesuchrist, homme, & Dieu: & bref, tant d'autres generaux Cōciles qui ont esté tenuz à diuerſes fois. Outre lesquels noz rois ont esté soigneux d'en conuoquer particulièrement pour la France. Sous Pelagius premier, il s'ē tint deux à Paris, 7. ou 8. à Orleās: deux à Tours, souz Paule premier, & de l'autorité de Pepin vn autre tou-

chant la S. Trinité cōtre les Grecs: souz Adriā premier, & de l'autorité de Charlemagne sept à Mayence, Reims, Tours, Chaalons, & Arles pour la reformation de l'estat de l'Eglise: sous gregoire 4. & de l'autorité de Loys le Debonnaire, vn à Aix la Chapelle, où la superfluité des gens d'Eglise fut defendue, dont ils se mutinerent, & furent cause de la maudite reuolte des enfans de Loys. Il sy en est tenu d'autres souz Leon 9. à Reims, pour la reformation des Ecclesiastiques: mais depuis les Papes eurent plus d'autorité, & celle de rois diminua, & par consequent les desordres furent plus tolerez en l'Eglise: & si ie ne me trompe, de la corruption des mœurs qu'vn chacun confesse, & que les historiens tesmoignent, il en pourra estre paruenue quelque partie à la doctrine, soit pour l'âbitiō, soit pour l'auarice des docteurs. Toutefois ie trouue encore, qu'Vrbain second vint en France luy mesme, pour tenir le Cōcile de Clermont en Auvergne. Paschal secōd pour tenir celuy de Troye, Innocent 4. pour tenir celuy de Lyon, Gregoire 10. pour vn autre que il en tint en la mesme ville: quant à Clement 5. il tenoit son siege en Auignon, & celebra le Concile vniuersel à Vienne en Dauphiné. Depuis Sigismond Empereur fit tenir celuy de Constance souz Jean 23. où il fut depōsé. Celuy de Basle souz Eugene 4. où il fut aussi depōsé. Celuy de Florence souz Amedee, ou Felix 5.

Apres tous lesquels il en fut tenu à Orleans vn
 par l'Eglise Gallicane contre le Pape Pie 2. qui
 vouloit abolir la Pragmatique fonction com-
 me heresie, qui n'estoit que les resultats du Cõ-
 cile de Basle, vn autre à Tours, contre le Pape
 Iules second, vn autre à Lyon, par le Roy Loys
 12. & le dernier a esté celuy de Trente, duquel
 nous parlions tantost. Vous voyez donc, Mes-
 sieurs, si les premiers conciles ont iamais serui
 de barrieres aux seconds, ny les seconds aux
 troisiemes, & ainsi consecutiuelement tant qu'il
 en a esté besoin. Il en prend de l'Eglise comme
 de nostre corps: quand nostre corps est mal dis-
 posé, il faut apeller le medecin, quand l'Eglise
 se trouue mal, il faut recourir au concile, & y
 faire cõsulter les remedes qui luy sont propres:
 mais comme ce n'est pas assez d'auoir ouy vne
 fois les raisons du medecin si lon ne continue
 quãd l'indispositiõ se renouuellera, il faut tout
 de mesme à toutes occasiõs rassembler ces sou-
 uerains medecins dont le concile doit estre cõ-
 posé, les ouir sans passion, imposer silence aux
 malades, prendre raison en payement, & se te-
 nir en fin à leurs solides resolutions. Que si l'E-
 glise retombe, il faut rapeller ces aides pour la
 releuer, & ainsi tousiours sans intermission, iuf-
 ques à la fin du monde, que le chef de l'eglise
 tiendra son dernier cõcile. Non pas que ie veil-
 le donner ceste peine aux Euesques à tous pro-
 pos, & à la moindre douleur que nous sentirõs

au bout du doigt: mais quand le mal est vniuer
 sel il faut chercher le remede de mesme. L'Egli-
 se Grecque, & la Latine se sont assemblées 14.
 & 15. fois pour cōclurre vn accord ensemble.
 Et combien qu'il y aye eu de la difficulté, com-
 me il en y a bié encore, si ne se sont elles point
 denoncé la guerre. Il n'y a que ces Reformez
 qui ont beu toute l'iniustice, deboutez de ce
 souuerain remede de reuniō par le moyē d'un
 Concile, ie dy d'un seul Concile, tant s'en faut
 qu'on leur en accorde plusieurs quand il en se-
 roit besoin. Si vous n'appellez animosité & in-
 iustice ce refus, de quel nom le baptiserez vous?
 Je n'eusse iamais pensé qu'il y eust eu tāt de rai-
 son en leur parti. Nous auons mieux aimé fai-
 re armer le Roy de Nauarre: il a mesme fallu le
 contraindre à toute force, plustost que nous
 forcer nousmesmes à condescendre à vne si e-
 quitable demāde. Enseignez moy, vous a il dit,
 si ie suis ignorāt, & vous l'avez frappé: il vous
 a tendu l'oreille, & vous luy avez fermé vostre
 bouche: il vous a demādé le chemin du ciel, &
 vous luy avez bouché voz oreilles. Vostre voix
 a esté pareille à celle des Iduméens en la prinse
 de Ierusalem, & chacun vous a ouy brui-
 re le sac, le sang, & le feu. De voz escholes, comme
 d'un cheual de Troye, sont soudainement for-
 ties ces armées, dont vous avez menassé ce pau-
 ure Prince, & les a eu presque sur le bras deuāt
 qu'il se soit desengourdy pour les soustenir.

C'est chose de recente memoire, & chacun me est tesmoin de la verité, & tant plus ie la considere, tant plus ie le tiens bien fondé en la prise des armes, voire rien ne fut iamais plus iuste que sa procedure. Il se deffend, mais assailli: il nous poursuit, mais apres auoir bien reculé, il se reuanche, mais outragé: il apelle l'estranger, mais dechassé des siens. Et qui n'estimera sa resolution apres tant de patiëce? On luy en veut, & qui luy reprochera la volonté qu'il a de se tenir sur ses gardes? on luy sappe ses honneurs, & ses dignitez, & pourquoy ne les remparera-il point? O que ces querelles cousteront bien cher à la France. Il semble que toutes les forces du monde y viennent fondre de toutes parts pour nous confondre & dissiper. Et combien que i'apprehente les domestiques, ie me crains toutefois plus des estrangers, sur tout de ces Espagnols qui s'affriandent petit à petit des douceurs de nostre patrie. Il y a long téps qu'il les enuient: & ne tiendra pas à la Ligue que leur enuie ne se contente. Car ces ennemis du repos de la France, où ils ne peuuent rien pretendre que par l'iniustice & la violéce, ferôt tousiours bon marché de ce qui sera en leur discretion pour le ietter à la bouche de ces Marranes souz esperance d'en retenir tousiours la superiorité. Mais ceste natiō est assez rusee pour se seruir de ce moyen à son propre aduantage, & cōme elle n'a pas accoustumé de seruir depuis quelques

années qu'elle a le vêt en pouppe, il sera malai
 sè aux François d'eschapper leur dominatiō s'ils
 n'y prennent garde de bonne heure. Et c'est ce
 que le Roy Philippe abbaye, c'est ce qui luy
 reste pour le comble de ses amples conquestes,
 c'est la fleur qui defaut à son bouquet: il l'a de-
 signée de l'œil des long temps, voicy le point
 qu'il y veut ietter la main pour s'en saisir. Et de
 fait la Frâce n'est pl^o qu'une fourmiliere de per-
 sonnes Espagnols, cest adire, de traistres & per-
 fides à la France: leurs coffres ne regorgent que
 les ducats d'Espagne, & ces poltrōs n'ont plus
 honte de vendre à beaux deniers contens la li-
 berté de noz deuanciers ont acquise auec tant
 de peine, & si Dieu ne rompt les desseins de ces
 corrompuz, nous nous trouuerōs à la fin les Je-
 nissaires de ce Turc, & les esclauues de ce Pirate.
 S'il estoit aisé de secouer le ioug aussi bien que
 de le prendre, ie souhaitteroy que ces beaux re-
 mucurs de mesnage experimētassēt pour quel-
 que temps la tyrannie de ces Busires, & j'espere
 roy de les voir bien tost recourir à leur franchi-
 se: mais il est besoin que nous nous gardiōs d'en
 venir là, voire d'en faire la moindre ouuerture
 du monde: car ces renards mettront aisēmēt
 le pied où ils pourront toucher des ongles, &
 tout le corps où ils aurōt touché du pié. Et puis
 qu'une partie de nous ploye souz le fardeau, j'e-
 spereray que Dieu fortifiera tellement le Roy de
 Nauarre, & tous les Princes du sang, que ces af-

famez n'en perdrôt que l'attêre. Et si ces Princes cōtinuent leurs belles œuures, ie conseille à ces pernicious cōseillers de l'Estat, de plier bagage, & sonner la retraitte de bonne heure, de peur q̄ la nuit de nos cōmuns malheurs ne les surprenne. Et quant à vous, Messieurs, ie vous prie de rechef, aiez pitié de ce misérable royaume. Considérez cōbien il importe de tenir l'estranger armé chez soy, representez vous les cris effroyables de tant de vesues, tant d'orphelins, tāt de famines desolees par la guerre ne mesurez pas le mal d'autrui par les aises de vostre vie, & souz ombre que les coups ne vous touchent point, ne cuidez pas que ceux de vos prochains ne vous doiuent esmouuoir à cōpassion, si vo^s auez iamais aymé ce Royaume en sa plus grande splendeur, hélas! cherissez ces petits rayons qui restēt encores: soustenez de toute vostre puissâce les masurés de ce beau bastiment, ne permettez point que ces Erostrates s'anoblissent de ses cendres. Et tandis que le Roy de Nauarre veille pour sa conseruation gardez de vous endormir sur vos miseres, au lieu d'ouurir soigneusement les yeux aux moyès de nous faire tous reposer dans les douceurs d'une paix. Autrement, Messieurs, n'attendez que le iugement de Dieu sur vos cœurs endurcis, & pour le feu de vos seditions que vous auez allumé, le feu de cōdamnation qui ne s'esteint iamais, & pour auoir voulu diuiser le Ta

bernacle du Seigneur, vn pareil supplice à ce-
 luy de Coré, Datan, & Abiron. Quant à moy ie
 me retire chez moy comme en vn port, d'où ie
 contempleray vostre naufrage, & si dans peu
 de temps ie ne vous voy disposer à vostre sau-
 ueté, & que par vos industries ces guerres con-
 tinuent, ie proteste de me rendre à ces Princes
 pour couürir leur fortune iusques à ce qu'ils
 ayēt emporté le pris des traualx que vous leur
 donnez, qui sera vn repos couronné de cōten-
 temēt, avec l'ayde de Dieu, lequel ie prie, Mes-
 sieurs, vous inspirer de sa grace, & generalemēt
 auoir pitié des afflictions de son Eglise. Ie vous
 enuoye le Canticque que le Roy de Nauarre a
 chanté sur sa victoire, comme ie l'ay receu tout
 presentement, par où vous verrez que ce Prin-
 ce n'a iamais attendu son support que d'en-
 haut. Et dequoy seruent donc les efforts des
 hommes?



CANTIQUE POUR LE

Roy de Nauarre, sur la signalée victoire qu'il a obtenu de l'armée de Monsieur de Joyeuse.

Puis que mes foibles mains au iour de ma victoire
N'estoyent rien que l'outil de tes puissantes mains:
Seigneur, ie veux qu'aussi ma bouche pour le moins
Me serue à te chanter vn Triomphe de gloire.

Ces bataillons fonduz au feu de noz courages
Sans estindre iamays noz ardeurs tant soyt peu,
Monstroyent que nous estions embrasé de ton feu
Et que la cire estoit le support de leurs rages.

Leur nombre deuant nous ne fut que de la poudre
Qui s'esparpille en l'air au tourbillon d'un vent.
Mais quoy? ton Ange aussi qui leur vint au deuant
Souffloit sur eux les vents & les feux de ta foudre.

Ainsi ceux qui dressoyent leur honneur de ma honte
Ie les vy renuerser dedans leur deshonneur,
Ces fronts qu'on adoroit n'aguere en leur bon-heur
Ie les vy malheureux qu'on n'en tenoit plus conte.

Quand ie repense encor à ce miracle estrange
D'auoir presque plustost vaincu que combatu,
Ie repense soudain, que toute ma vertu
Sans ta vertu, Seigneur, n'estoit que de la fange.

Mais ainsi qu'au Rocher l'orage se consume,
Mon cœur en ce peril par ta force affermy
Soustint sans s'esbranler le flot de l'ennemy
Et tout soudain ce flot se rompit en escume.

Ces courages enflés du vent de l'esperance
Creuerent à la fin d'abondance de vent,
Et ce mont de l'orgueil qu'ilz alloient releuant
Hurta contre le Ciel Et vint en decadence.

Cest œil ouuert au sang, au meurtre & à l'outrage
Et d'outrage, & de meurtre, & de sang fut couuert,
Et ce gozier iadis aux blasphêmes ouuert.
Estouffa du venin de sa dernière rage.

Seigneur, mon cœur s'enflamme au brazier de la ioye
Quand de tes ennemis les brazier sont esteints,
Et qu'ayant bien tendu les rets de leurs desseins
Ils sont en fin eux mesme & leur chasse Et leur proye.

Ceux cy sans cause en moy pour suiroyent ta Iustice,
Mais tu les as Seigneur iustement attrapez,
Les neudx de leurs cordages ont esté tous coupeZ,
Et leur crime à la fin a trouué son supplice.

Ainsi pour bien ranger de pareilles iniures,
Il n'est que d'auoir Dieu tousiours de son costé
N'entreZ point en desfi de sa fidelité
Il paye tout à coup l'attente & les rsures.

Le temps dont la longueur tant de bien nous aporte
Las! pour nostre merite encor n'est que trop court
Et Dieu ne scauroyt estre à noZ cris asseZ sourd
Quand nous faisons les sourds s'il crie à nostre porte.

Mais crie nonobstant & me perce l'oreille,
A celle fin, Seigneur, que s'entende ta voix,
Et m'enseignant tousiours le bien que ie te dois
Seigneur, fay le moy faire & me rens la pareille.

Fay qu'en mesmes dangers iamays ie ne m'estonne
Et puis que des hontes ce bien m'ont auancé
Ne te contente point d'auoyr bien commencé.
Il faut que de la fin l'ouurage se couronne.

Fin.